

quì avanti posta, et fu presa di largo. Ave: 12 non sinceri, 234 di no, 866 di la parte.

Fu posto, per li Consieri, dar licentia a sier Hironimo Breani castelan di Pontevigo, di venir in questa cità per zorni 15, lassando in locho suo sier Zuan Batista Breani suo fradelo. Ave: 958, 129, 0.

Fu posto, per li Consieri, una gratia a . . .

Fo chiamà 40 gentilhomeni, cavalieri et dotori et zoveni di Pregadi, et che vien in Pregadi, per andar diman a San Spirito contra don Lopes di Soria orator di l'imperador, vien a far residentia in questa tera et è zonto a Chioza, et zà è zonta sua moier, qual mena con lui a star, aloza in cà Dandolo in cale de le Rasse, di sotto.

Fu fato patron a l'Arsenal, in luogo di sier Antonio Donado, a chi Dio perdoni, sier Antonio Calbo è proveditor sora il cotimo di Londra qu. sier Hironimo, tolto per sier Alvisè suo fradelo, el qual tolse etiam sier Marco Antonio Calbo fo a le Raxon vechie suo fradelo di la Zonta, et etiam lui rimase da sier Bernardin da cà Taiapiera fo di la Zonta qu. sier Nicolò, et da alcuni Consigli in quà riman di Pregadi et Zonta senza titolo de' titoladi, cossa che prima non se consuetava de far, et chi havea titolo rimaneva.

Fu fato 11 voxe, et provedador sora le legne, et niun passoe.

*Di Roma, fo lettere, di l'orator nostro, di 7.* Il sumario scriverò, lete sarano in Pregadi.

In questa matina, sier Piero Michiel capitano di le galie di Barbaria per andar al suo viazo si levò di sora porto et poi tornò.

*A dì 12.* La matina. Fo lettere di Zara, dil Contarini, va orator al Signor turco, et di sier Nicolò Justinian va baylo. Dil suo zonzor li con la gallia soracomito sier Andrea Contarini, et non trovano zurme da interzar la gallia.

*Di sier Francesco Dandolo capitano di l' Golfo,* con avisi di fuste, sicome dirò di sotto.

Noto. Sabato di note venendo la domenega, di ordine di Cai di X, a requisition dil legato, fu fato retenir uno marangon teniva botega sul campo de San Giacomo de l'Orio chiamato . . . , per luterian, et posto in . . .

*Da Milan, fo lettere di l'orator nostro, di . . .* Avisi bauti che a dì 22 l'imperador zonse a Barzelona.

Da poi disnar, fo Collegio de la Signoria et Savi et Cai di X, in materia de avogadori extraordinari,

per le cose di la Camera de imprestidi, di quelli scuode a 4 per 100 et dia scuoder a do, et voriano venir al Pregadi con le loro opinion, et parlò contra sier Lorenzo Bragadin el consier, facendo un longo discorso, et al principio quando fo comenzà le fazion pagar a la Camera de imprestidi Monte vechio, doxe missier Vidal Michiel . . . per la guera con Hemanuel imperator di Constantinopoli, il qual doxe poi fo morto su la riva andando a San Zacaria per questo, et disse molte parole etc. et non è da far novità; ma non compite, remesso a un altro Collegio.

*Da Zara, fo lettere di sier Thomà Contarini orator, et sier Nicolò Justinian baylo, di . . .* Come non poleno haver homeni da interzar la gallia Contarina dove è suso el baylo. Scriveno el zonzor li dil fiol de Hironimo da Zara et altri oratori dil re de Romani, vanno a Ragusi per passar per tera a Constantinopoli.

El fo parlato fra li Savi chi voria se armasse a ruodolo, chi el montasse su la gallia soracomito sier Zuan Morexin, la qual è in Histria, et si mudi la gallia et se li mandi una nuova, per esser la soa mal conditionata, et è ben a ordine de zurme.

Noto. Il formento cresce, è a lire 9 soldi 10 el staro, et è stà trato assà formenti de la tera; il primo Conseio di X se farà provision.

In questo zorno, a hore 18 zonse in questa tera don Lopes di Soria hispano, orator de l'imperator, contra el qual andoe a San Spirito molli de zentilhomeni chiamati heri a Consiglio et fono tuti numero 28, et a San Spirito disnoe a spexe de la Signoria nostra, li fè le parole sier Hironimo da cà Taiapiera el dotor, et la sera li fo fato licentia.

*Di Gradisca, vidi lettere particular di sier Zuan Vituri el cavalier, di . . .* Mazo, drizzate a sier Lorenzo Moro, et sier Vincenzo Gritti soi cugnadi a dì ultimo. Scrissi per prè Zorzi quanto accadeva, poi hebbi lettere dal reverendissimo episcopo de Lubiana lochotenente in Viena, et mi scrive quello me havea scritto quel mio amico da Viena cerca l'ambasciator dil Turco, con havermi mandati li capitoli portati per dito ambascador a la Maestà dil re di Romani, i quali son questi:

Et prima, el Gran turco aceta che la Maestà dil re tegna pacificamente tutto quello che l' tien nel regno de Hongaria, et la regina sua sorella con tuti li soi paexi, et vol dito Turco aiutar la Maestà dil re contra tuti i desubedienti et nemigi de Sua Maestà over quelli li volesse far guera. Item, vol che l' possi tratar acordo, con il mezo dil Gritti, infra Soa